



# QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORUM.

Die Jovis 16. Novembris.

M. LUDOVICO GAYANT

DOCTORE MEDICO, PRÆSIDE.

*An Arthritidis origo semper ab Arteriis?*

I.

**D**OLORES inter qui corporis artus occupant, alii medias regiones, quales lues venerea proferre solet, alii articulos obsident, quos Arthritidis nomen complectitur. Hæc est sævus & insignis articulorum dolor ex intervallis ferè invadens. Quâlibet anni tempestate recurrit, præcipuè vere & autumno. Tot sunt Arthritidis differentiæ quot sunt ossa quæ per Diarthrosin colligantur: tribus tamen tantum usus nomina indidit. Chiragra manus infestat, Podagra pedes, Ischias sedem habet ad summam natem circa nervos qui à lumbis & osse sacro emergentes feruntur in crura. Quæcumque in alio figitur articulo, ut immanes humeri, & Omoplatæ cruciatus, generis nomine appellatur. Altera porro hæreditaria est quæ cum semine migrat in posteros; Altera adventitia, quæ vitæ errore contrahitur, præsertim Baccho & Venere, maximè illâ quæ corpore erecto exercetur. In quibusdam regionibus

putà Moraviâ & Austriâ , morbus est Endemius. Pauperes odit , mollius in umbrâ & otio viventes aggreditur. Parcit pueris ante Veneris usum. Eunuchos non adoritur modò sint in viâ temperantes & à parentibus Arthriticis non orti. In senibus altas agit radices , in juvenibus citius dissipatur , neutris est lethalis. Hujus causâ proxima & continens non est simplex intemperies , sed ferosus ichor Articulis firmiter adhærens.

## II.

**A**RTHRITIDEM à pituitâ , Bile flavâ vel atrâ non progigni satis patet ex vehementiâ doloris : adde quod humores illi facilè in pus abeunt , cum tantillùm sanguinis habent admixtum , nulla autem unquàm in Arthritide suppuratio. Restat ergò ut humorem articulis infixum serum esse statuamus , illudque salsum , acre , aut acidum , quod quidèni membranas sensu exquisitissimo præditas pungendo , divellendo , prò vario tum acrimoniæ tum tenuitatis gradu diversa profert symptomata. Interdum calorem , ruborem & dolorem latè diffusum cum febre invehit , interdum cum dolore duntaxat se prodit ; modò brevi evanescit , sæpe diù discruciat , modò in tophos , & calculos concrescit , cum scilicet serum aliquid advexit humoris crassioris & excrementitii quod temporis diuturnitate lentescens , tandem indurefcit ; vel cum aciditate suâ mucum articulorum cogit.

## III.

**F**LUXIONE fit Arthritis , non congestione. Dolor dexter succedens sinistro novam fluxionem arguit. Humor influens non à cachexiâ ortum ducit , nam cruditas incumbens in pedes tumorem facit non Podagram. Non ex imi ventris partibus irrumpit ; viscida enim pituita quæ viscera infarcit , promptè cumulatèque , vel uno die invadere nequit inferiores artus , nedum superiores , cum ad motum omninò sit inhabilis , & ad illius deterfionem longum temporis spatium exigatur ; præterea nunquàm remigrat in venas , insipida est , hinc ad feriendum , vellicandum inepta ; deniquè alvi fluxu excitato non idè cedit morbus , imò per totum paroxysmi decursum sæpe fluit alvus , eo superflite. Nec ab externis capitis partibus materia coacervata sub cute decurrit in articulos , nam quid opus est ignotas & insolitas vias comminisci , cum tot na-

tura canales devehendis quocumquè humoribus destinaverit. Hisunt arteriæ, quæ in universum corpus disseminatæ, & salutares & pravos humores circumferunt: dùm acri serosoque ichore plus æquo abundant, per ipsarum ora tenuis ille humor excidit, qui si detruditur in articulos imbecilles ob viarum amplitudinem, membranarumquè laxitatem, Arthriticos inferat dolores. Non tamen in arteriis hujus morbi fomes semper delitescit.

## IV.

**C**EREBRUM omnium ferè fluxionum fons, humoris Arthritidem procreantis origo ab Hippocrate stabilitur. Illud summam corporis partem occupat, temperiemquè obtinet remissè calidam; Osseo tegumento circumseptum est, ne irruentibus extrinsecus injuriis sit obnoxium: Verum nullo munitur adversus intestinos hostes præsidio. Hi sunt tùm viscerum æstuantium fervor, quæ vapores salios & acres sursum emittunt, qui quidè in hac frigidiori rationis arce (è quâ propter arctam ossium compagem avolare nequeunt) condensantur, & fatali nimbo in membra depluunt, non secus ac vapores radiis solaribus è terrâ elati, qui mediæ regionis frigore concreti in imbrem decidunt: tùm humores quilibet copiâ vel qualitate molesti, quibus dùm turgidum est inutilem conatur excutere sarcinam in subjectas partes per meatus excrementorum secretioni dicatos, cum pereos se se exonerare non valet, quâ data porta ruit noxius humor: inde tot morborum genera exurgunt, qualia sunt convulsio, Rheumatismus, Epilepsia, Apoplexia, Paralysis.

## V.

**P**ALAM est omnibus maximam esse affinitatem Arthritidem inter & Rheumatismum. Arthritici quamplurimi Rheumatismo se correptos prædicant, quasi Arthritis esset eâ diuexatis probro & dedecori. Hoc est inter utrumque affectum discrimen, quod in illâ humor sit acrior & minori copiâ; Cæterùm in eâdem parte nempè cerebro utriusque origo sæpè latitat. Et reverà in primo Arthritidis insultu percipitur ut plurimum dolor qui per vertebra in cubitos, & manus, coxendicem, genua, pedesvè sensim devolvitur non sinè quodam frigoris sensu quo corpus omne perhorrescit: Unde con-

jici potest ferosum laticem à cerebro de fluere secundum externos spinalis medullæ villos, qui ad articulos usque producuntur. Nec propterea is humor Paralyfim efficit, quippè qui internam nervorum substantiam non pervadit, propter pororum angustiam, & motus rapiditatem; nec convulsionem parit, dum articulis adhærescit, quia in membranis & tendonibus impactus est non vero in principio nervorum.

*Ergo Arthritis origo non semper ab Arteriis?*

### DOMINI DOCTORES DISPUTATURI.

<i>M. Raymundus Finot.</i>	<i>M. Ioannes Baptista Ferrand.</i>	<i>M. Ioann. Armandus Mauvilain.</i>
<i>M. Robertus Raoult. Scholæ Professor.</i>	<i>M. Carolus Marteau.</i>	<i>M. Bertinus Dieuxwoye.</i>
<i>M. Matthæus Thuillier. Scholarum Professor.</i>	<i>M. Anthoinus le Moine.</i>	<i>M. Stephanus Bachot.</i>

Proponcbat Lutetiæ PETRUS D'AQUIN, Parisinus,  
A. R. S. H. MDCLXXIII.

---

PARISIIS,  
Ex Typographiâ FRANCISGI MUGUET, Regis ac Illustriss.  
Archiepiscopi Typographi.